



Broj/Број: 01/2-50-1-2-35/06
Sarajevo/Сарајево: 23.3.2006.

ZAPISNIK

sa 35. sjednice Komisije za spoljne poslove

Sjednica je održana 22.3.2006. sa početkom u 13,00 sati.

Sjednici su prisustvovali sljedeći njeni članovi: Milorad Živković, Izet Hadžić, Sead Avdić, Nenad Mišić i Mehmed Žilić.

Odsutni su bili: Martin Raguž, Jelina Đurković, Azra Hadžiahmetović i Vinko Zorić.

Sjednici su prisustvovali i Beita Delić, šef Odjeljenja za finansijske aranžmane Ministarstva finansija i trezora i, u njenom posljednjem dijelu, Ana Trišić – Babić, šef sektora za bilateralne poslove Ministarstva vanjskih poslova BiH.

Zapisnik je vodila Merdžana Iglica, sekretar Komisije i Edina Harbinja, student – stažista.

Prvi zamjenik predsjedavajućeg Komisije, Milorad Živković, koji je predsjedavao sjednicom, predložio je sljedeći:

DNEVNI RED

1. Usvajanje zapisnika 33. sjednice Komisije za vanjske poslove Predstavničkog doma Parlamentarne skupštine BiH, održane 14.2.2006.godine i usvajanje zapisnika 34. sjednice Komisije za vanjske poslove Predstavničkog doma Parlamentarne skupštine BiH, održane 6.3.2006.godine;
2. Razmatranje „Aide-memoirea“ grčke ambasadorice u BiH o tzv. Kiparskom pitanju, kao i informacije iz Ministarstva spoljnih poslova BiH o ovoj temi;
3. Razmatranje informacije iz ambasade Islamske Republike Pakistan o solidarnosti Pakistana s Kašmirom;
4. Razmatranje najnovije Rezolucije Evropskog parlamenta o BiH od 16.2.2006. i Rezolucije o Srebrenici od 7.7.2005.;
5. Informacija o posjeti Komiteta za odnose Parlamenta s javnošću Skupštine Zapadnoevropske unije 22.-24.3.2006. godine;
6. Zabilješka sa zajedničkog sastanka Komisije za spoljne poslove Predstavničkog doma PSBiH i Komisije za spoljnu i trgovinsku politiku Doma naroda PSBiH sa Visokim komitetom Parlamenta Finske;
7. Informacija o prihvatanju inicijative za susret od strane spoljnopolitičkog odbora Parlamenta Republike Češke;
8. Saopštenje tajvanske radne grupe Centralnog komiteta Komunističke partije Kine i Kancelarije Državnog vijeća za pitanja Tajvana o odluci Chen Shui-Biena o ukidanju funkcije „Vijeća nacionalnog ujedinjenja“ i ukidanu provedbe „Smjernica nacionalnog ujedinjenja“;

9. Davanje saglasnosti za ratifikaciju:

- a) Ugovora o izmjenama i dopunama na Ugovor o razvojnom kreditu – Projekat upravljanja čvrstim otpadom između Bosne i Hercegovine i Međunarodne asocijacije za razvoj;
- b) Ugovora o izmjenama i dopunama na Ugovor o razvojnom kreditu – Projekat tehničke pomoći u oblasti socijanog osiguranja između Bosne i Hercegovine i Međunarodne asocijacije za razvoj;
- c) Ugovora između Bosne i Hercegovine i Republike Makedonije o uređenju međusobnih imovinsko pravnih odnosa.

10. Tekuća pitanja.

Prvi zamjenik predsjedavajućeg Komisije je stavio predloženi dnevni red na raspravu. Obzirom da nije bilo prigovora niti sugestija, dnevni red je jednoglasno usvojen.

Ad.1. G. Živković je konstatovao da je, s obzirom da na prethodnoj sjednici Komisije nije bilo kvoruma, potrebno na ovoj sjednici usvojiti zapisnike sa 33. i 34. sjednice. Zatim je g. Živković oba zapisnika stavio na raspravu, i s obzirom da nije bilo primjedbi, oba zapisnika su jednoglasno usvojena.

Ad.2. Sekretar Komisije, gđa Iglica, je pojasnila članovima Komisije da je „Aide-memoire“ o tzv. Kiparskom pitanju g. Ragužu uručila ambasadorica Grčke prilikom njene nastupne posjete PSBiH, te da je stoga ova tačka uvrštena u dnevni red. G. Živković je predložio da Komisija primi k znanju ovaj dokument, na šta su se svi prisutni članovi Komisije pozitivno izjasnili.

Ad.3. Komisija se usaglasila da se o informaciji iz ambasade Islamske Republike Pakistan o solidarnosti Pakistana s Kašmirom izjasni kao o prethodnom dokumentu, odnosno da i ovaj dokument primi k znanju.

Ad.4. U uvodu rasprave o Rezoluciji Evropskog parlamenta o BiH od 16.2.2006. kao i Rezoluciji o Srebrenici od 7.7.2005., g. Živković je naglasio da obje ove rezolucije čekaju već par mjeseci na red za razmatranje. Potom je otvorio raspravu o ovim rezolucijama, a Komisija se na prijedlog g. Avdića izjasnila kako ih prima k znanju bez primjedbi i komentara.

Ad.5. Gđa Iglica je informisala Komisiju o posjeti Komiteta za odnose Parlamenta s javnošću Skupštine Zapadnoevropske unije i zamolila članove Komisije da u što većem broju dođu na sastanak koji će se održati 23.3. u terminu od 10,30 – 11,15. G. Živković je potom, uz saglasnost ostalih prisutnih članova, zaključio da se obavezuju predsjedavajući i zamjenici predsjedavajućeg da prisustvuju sastanku, a poželjno bi bilo da i ostali članovi Komisije prisustvuju sastanku, kako se ne bi desilo da niti jedan predstavnik Komisije ne bude prisutan.

Ad.6. G. Živković je, konstatujući da je zabilješka sa sastanka Komisije s predstavnicima Visokog komiteta Parlamenta Finske sveobuhvatna i detaljna, zamolio g. Žilića koji je prisustvovao ovom sastanku, da ukratko usmeno upozna Komisiju sa glavnim akcentima sastanka. G. Žilić je rekao da su predstavnici Komisije za spoljne poslove Predstavničkog doma izvijestili goste o toku ustavnih reformi u BiH, te o potrebi olakšavanja viznog režima za građane BiH. Delegacija

finskog parlamenta je obećala da će se zauzeti za olakšavanje viznog režima te je ponudila svoju pomoć oko uređenja i reforme administracije u BiH. Obzirom da je finska administracija jedna od najbolje organizovanih u Evropi, delegacija Finske je ponudila PSBiH da pošalje svoju delegaciju u posjetu Finskoj, kako bi se pozitivna iskustva iz ove oblasti mogla prenijeti i pri uređenju administracije u BiH. G. Živković je potom ukazao na potrebu bliže saradnje s Finskom, s obzirom da ova zemlja preuzima predsjedanje EU. Pozicija Komisije od samog početka je da se sa zemljama članicama EU treba intenzivnije sarađivati tokom njihovog šestomjesečnog predsjedavanja EU. Gđa Iglica je članove Komisije podsjetila na pozitivan primjer ovakve saradnje s Austrijom. Naime, g. Raguž i g. Čengić prisustvovat će krajem marta ispred PSBiH konferenciji u Beču, gdje će učestvovati predstavnici spoljnopolitičkih odbora zemalja članica EU, zemalja kandidata i zemalja koje su u procesu stabilizacije i pridruživanja sa EU. Na ovoj veoma značajnoj konferenciji predsjednici dva vanjskopolitička odbora PSBiH imat će i svoja obraćanja, te bilateralne susrete sa svojim kolegama, a g. Raguž će se susresti sa predsjednikom spoljnopolitičkog odbora Nacionalnog savjeta Austrije, g. Peterom Schiederom, bivšim predsjednikom Parlamentarne skupštine Vijeća Evrope i velikim prijateljem BiH. G. Živković je potom ponovo ukazao na potrebu uže saradnje s Finskom kada ova država preuzme predsjedavanje EU, te da bi bilo dobro da Komisija posjeti Parlament Finske, kao i da uputi poziv delegaciji vanjskopolitičkog odbora Parlamenta Finske za posjetu Komisiji za spoljne poslove PSBiH. G. Avdić je naglasio potrebu operacionalizacije posjete Finskoj, te potrebu izrade posebnog programa upoznavanja s finskom administracijom, s kojim bi se zatim upoznao i spoljnopolitički odbor finskog parlamenta. Gđa Iglica je podsjetila članove Komisije da je delegacija finskog parlamenta ustvari bila sačinjena od njihovog odbora za evropske intergracije i posjeta je bila prvenstveno Zajedničkoj komisiji za evropske integracije PSBiH, a ne njenim spoljnopolitičkim odborima, te da se inicijativa za susret treba uputiti vanjskopolitičkom odboru finskog parlamenta. Prvi zamjenik predsjedavajućeg je zaključio da je potrebno uspostaviti kontakt s Zajedničkom komisijom za evropske integracije i provjeriti kakvu vrstu saradnje ova komisija ima i planira s Parlamentom Finske, te koordinirati aktivnosti na uspostavljanju tješnje međuparlamentarne saradnje.

Ad.7. U vezi informacije o prihvatanju inicijative za susret s delegacijom Parlamenta Republike Češke, g. Živković je rekao da je on bio u posjeti Češkoj i to kao vođa delegacije Zajedničke komisije za evropske integracije, zajedno s gđom Palavrić, g. Brka i još nekim članovima Zajedničke komisije. Gđa Iglica je zatim upoznala Komisiju s činjenicom da je g. Raguž imao sastanak s češkim ambasadorom i da je tom prilikom dogovorena saradnja dva spoljnopolitička odbora. Prema njenim riječima, prva posjeta bi bila ona od strane češke delegacije, a zatim bi u posjetu Češkoj išla Komisija za spoljne poslove Predstavničkog doma. Na pitanje g. Živkovića o tome otkud ova inicijativa predsjedavajućeg, gđa Iglica je odgovorila da je to u skladu s inicijativom Komisije o intenziviranju saradnje s zemljama iz okruženja i novim članicama EU. Nakon prijedloga g. Hadžića i g. Mišića da se najprije pozove Komisija za spoljne poslove Parlamenta Češke u posjetu BiH, prvi zamjenik predsjedavajućeg je predložio zaključak da se u narednom periodu uputi poziv spoljnopolitičkom odboru češkog parlamenta za posjetu Komisiji za spoljne poslove PSBiH.

Ad.8. U vezi s Saopštenjem tajvanske radne grupe Centralnog komiteta Komunističke partije Kine i Kancelarije Državnog vijeća za pitanja Tajvana o odluci Chen Shui-Biena o ukidanju funkcije „Vijeća nacionalnog ujedinjenja“ i ukidanju provedbe „Smjernica nacionalnog ujedinjenja“, gđa Iglica je podsjetila Komisiju da je g. Raguž ovaj materijal dobio prilikom susreta s kineskim ambasadorom u BiH. G. Hadžić je ukazao na važnost potrebe da se Komisija odredi prema ovom pitanju, uzevši u obzir odnose BiH i Kine. G. Žilić je rekao da je potrebno podržati stavove Kine ukoliko se žele očuvati dobri odnosi s ovom zemljom. G. Živković je na to predložio da se zaključi kako je Komisija ovaj memorandum primila k znanju, u skladu s opštim odrednicama spoljne politike BiH prema Kini. G. Žilić je, budući da je novi član Komisije, upitao koji je zvanični stav BiH prema pitanju Tajvana, a gđa Iglica je odgovorila da BiH podržava cjelovitost Kine. G. Avdić je potom rekao da BiH kao država ne bi trebala davati bilo kakvo mišljenje Komunističkoj partiji Kine, niti bilo kojoj drugoj partiji, te da tako ni ova Komisija ne treba komunicirati s partijom, nego samo s državnim organom druge zemlje. G. Žilić je ponovo ukazao na potrebu upućivanja odgovora Kini, obzirom da BiH podržava zvaničnu politiku Kine po ovom pitanju. Na koncu se Komisija odredila da primi k znanju saopštenje tajvanske radne grupe Centralnog komiteta Komunističke partije Kine i Kancelarije Državnog vijeća za pitanja Tajvana.

Ad.9. U vezi sa davanjem prethodne saglasnosti na Ugovor o izmjenama i dopunama na Ugovor o razvojnom kreditu – Projekat upravljanja čvrstim otpadom između Bosne i Hercegovine i Međunarodne asocijacije za razvoj, gđa Bejta Delić, predstavica Ministarstva finansija i trezora BiH je ukratko upoznala Komisiju s uslovima kredita. Iznos sredstava kredita je 8 miliona dolara, uz specijalna prava vučenja od 5,6 miliona. Alokacija sredstava prema entitetima će se vršiti u omjeru od 1/3 za RS i 2/3 iznosa za FBiH. Namjena kredita je nastavak projekta upravljanja čvrstim otpadom (prikupljanje, prenos, odlaganje otpada, poboljšanje ekološkog stanja) koji je počeo 2002. godine. Period otplate kredita je 20 godina, uz 10 godina grace perioda, a sredstva se mogu koristiti do 30.11.2009. godine. Prema riječima gđe Delić, sredstva su namijenjena sljedećim gradovima u BiH: Mostaru, Bijaću, Tuzli, Zenici i Bijeljini. G. Avdić je postavio pitanje o strukturi utroška sredstava, na šta je gđa Delić odgovorila da je većina sredstava namijenjena nabavci opreme, izgradnji infrastrukture, a najmanje konsultantskim uslugama, obzirom da s ovdje radi o investicijskom projektu. Kako niko od prisutnih članova Komisije nije imao dodatnih pitanja, nakon glasanja, Komisija je jednoglasno dala saglasnost za ratifikaciju ovog ugovora.

Potom je gđa Delić ukratko upoznala Komisiju sa karakteristikama Ugovora o izmjenama i dopunama na Ugovor o razvojnom kreditu – Projekat tehničke pomoći u oblasti socijanog osiguranja između Bosne i Hercegovine i Međunarodne asocijacije za razvoj, čija je ukupna vrijednost 2 miliona dolara, uz 1,4 milion specijanih prava vučenja. FBiH je namijenjeno 1,4 miliona dolara, a RS 0,8 miliona. Uslovi kredita su isti kao i u prethodnom ugovoru. Cilj projekta za koji su namijenjena sredstva iz kredita je povećavanje efikasnosti i funkcionalnosti sistema zdravstvenog i penzijskog osiguranja u BiH. Predviđene su revizije fondova, institucionalni okvir za kategorisanje invalidnosti, konsultantske usluge, nabavka sredstava i opreme za novu instituciju. G. Avdić je zatim postavio pitanje gđi Delić o tome ko je naručio ovaj kredit. Gđa Delić je odgovorila da je projekat naručen od strane entitetskih ministarstava zdravlja, preko nadležnog državnog ministarstva. G. Avdić je na to

upozorio Komisiju da ova tijela u okviru svojih nadležnosti i djelatnosti trebaju redovno raditi ove poslove, a ne zaduživati državu BiH sredstvima koja joj nisu potrebna. G. Hadžić je predložio da se na sljedeću sjednicu Komisije pozovu entitetski ministri zdravlja i da oni brane ovaj pojeekat pred Komisijom. G. Živković je postavio pitanje gđi Delić da li je počela implementacija projekta, na šta je ona odgovorila da su ova sredstva samo nastavak na osnovih 7 miliona dolara sredstava za projekat koji je počeo da se provodi 2003. godine. G. Živković je izrazio zadovoljstvo činjenicom da Komisija sada uz osnovni tekst dobija i anekse, te je sada moguće vidjeti i kako su sredstva raspoređena. U ovom sporazumu, primijetio je g. Živković, četiri puta više sredstva je namijenjeno konsultantskim uslugama nego opremi, infrastrukturi i slično. G. Živković je zatim pozvao Komisiju da se izjasni o ovom ugovoru. Svi prisutni članovi Komisije su bili protiv davanja prethodne saglasnosti za ovaj sporazum uz zaključak da je potrebno izvršiti dodatne konsultacije sa ministrima zdravlja entiteta.

Komisija je u nastavku, a nakon kratkog objašnjenja sadržine koji je dala gđa Ana Trišić-Babić, pomoćnica ministra spoljnih poslova BiH, dala prethodnu saglasnost za ratifikaciju Ugovora između Bosne i Hercegovine i Republike Makedonije o uređenju međusobnih imovinsko-pravnih odnosa. Ovaj ugovor će se naći na dnevnom redu jedne od narednih sjednica Predstavničkog doma PSBiH.

Sjednica je završena u 14,15 sati.

Prvi zamjenik predsjedavajućeg Komisije
Milorad Živković

Zapisnik sa 35. sjednice Komisije sačinile:

Merdžana Iglica, sekretar Komisije
Edina Harbinja, student – stažista

Kopija: MVP-u BiH